

摘藻堂四庫全書薈要

史部

欽定四庫全書叢要

史部

舊五代史卷七十五至
九

詳校官內閣侍讀臣孫球

欽定四庫全書薈要卷五千四百七十六

舊五代史卷七十五

宋門下侍郎參知政事監修國史薛居正等撰

晉書第一

高祖紀一

高祖聖文章武明德孝皇帝姓石氏諱敬瑭太原人也
本衛大夫礪漢丞相奮之後漢裒闕輔亂子孫流汎西
裔故有居甘州者焉四代祖璟以唐元和中與沙陀軍

都督朱耶氏自靈武入附憲宗嘉之隸為河東陰山府

裨校以邊功累官至朔州刺史天福二年追尊為孝安

皇帝廟號靖祖陵曰義陵祖妣秦氏追謚為孝安元皇

后三代祖柳早薨贈左散騎常侍追尊為孝簡皇帝廟

號肅祖陵曰惠陵祖妣安氏追謚孝簡恭皇后皇祖諱

翌任振武防禦使贈尚書右僕射追尊孝平皇帝廟號

睿祖陵曰康陵祖妣米氏追謚孝平獻皇后皇考諱紹

雍番字臬揆雞善騎射有經遠大畧事後唐武皇及莊

宗累立戰功與周德威相亞歷平洛二州刺史薨子任

贈太傅追尊為孝元皇帝廟號憲祖陵曰昌陵皇妣何

氏追謚孝元懿皇后帝即孝元之第二子也以唐景福

元年二月二十八日生於太原汾陽里時有白氣充庭

人甚異焉及長性沉澹寡言笑讀兵法重李牧周亞夫

行事唐明宗為代州刺史每深心器之因妻以愛女唐

莊宗聞其善射擢居左右明宗請隸大軍從之後明宗

從莊宗征行命帝領親騎號三討軍倚以心腹天祐十

二年莊宗併有河北之地開府于鄴梁追上將劉鄩以兵五萬營于莘十三年二月鄩引兵突至清平薄于城下莊宗自至甘陵兵未陣多為鄩所掩帝領十餘騎橫槊深入東西馳突無敢當者卒全部伍而還莊宗壯之拊其背曰將門出將言不謬爾因頒以器帛復親為啗酥當時以為異恩由是知名明年鄩兵陣于莘之西北明宗從莊宗酣戰久之塵埃四合帝與明宗俱陷陣內帝挺身躍劍反復轉鬪行數十里逐鄩于故元城之東

是日邠軍殺傷過半十五年唐軍拔楊劉鎮梁將賀瓌
設伏于無石山明宗為瓌所迫帝為後殿破梁軍五百
餘騎按轡而還十二月莊宗與梁軍大戰于胡柳陂衆
號十萬總管周德威將左軍雜以燕人前鋒不利德威
死之莊宗率步衆五千固守高陵以遇敵之銳明宗獨
完右廣伏于土山之下顧謂帝曰梁人首獲其利旌旗
甚整何計可以挫之帝曰臘後寒如此出手墮指彼多
步衆易進難退莫若啜糲飲水徐而困之且超乘徒行

其勢不等一擊而破期在必勝明宗曰是吾心也會日
暮梁軍列于平野五六萬人為一方陣麾遊騎以追唐
軍帝曰敵將遁矣乃請明宗令士整冑寬而羅之命左
射軍三百人鳴矢馳轉漸束其勢以數千騎合之迨夜
旌旗皆靡而一角先潰三面踵之其牙竿相擊若火爆
之聲橫尸積甲不可勝計由是梁人勢削莊宗進營德
勝渡十八年十月又從明宗戰梁人于德勝渡敗其將
戴思遠殺二萬餘人十九年戰胡盧套唐軍稍卻帝親

其敵銳拔劍闢道肩護明宗而退敵人望之無敢襲者
二十年十月從明宗觀梁人之楊村寨部曲皆不環甲
俄而敵出不意以兵掩明宗刀將及背帝挾戰戟而進
一擊而凶酋落馬者數輩明宗遂解其難是歲莊宗即
位于鄴改元同光遣明宗越河懸軍深入以取鄆鄆人
始不之覺帝以五十騎從明宗涉濟突東門而入鄆兵
來拒帝中刃翼明宗羅兵通衢巍然不動會後騎繼至
遂拔中城以據之既而平汴水滅梁室致莊宗一統集

明宗大勲帝與唐末帝功居其最莊宗朝官未顯者以
帝不好矜伐故也惟明宗心知之同光四年二月趙在
禮據鄴為亂朝廷遣元行欽招之不下羣議紛然以為
非明宗不可莊宗乃以明宗為統帥時帝從行至魏諸
軍有變叩馬請明宗帝河北明宗受霍彥威勸將自訴
于天子遂佯諾諸軍亦恐事不果而散者甚衆明宗所
全者惟常山一軍而已西次魏縣帝密言于明宗曰猶
豫者兵家大忌必若求訴宜決其行某願率三百騎先

趨汴水以探虎口如遂其志請大軍速進夷門者天下之要害也據之可以自雪安有上將與三軍言變他日有平手乎危在頃刻不宜恬然明宗至相州遂分驍騎三百付之遣帝由黎陽濟河自汴西門而入因據其城及明宗入汴莊宗親統師亦至城之西北五里登高歎曰吾不濟矣由此莊宗從兵大潰來歸明宗明宗尋遣帝令率兵為前鋒趨汜水關俄而莊宗遇內難而崩是月明宗入洛嘉帝之功自總管府都校署陝府兵馬留

後明宗即位改元天成五月加帝光祿大夫檢校司徒
充陝州保義軍節度使歲未期而軍民之政大治焉二
年二月加檢校太傅兼六軍諸衛副使進封開國伯增
食邑四百戶是月帝赴關以倖六軍諸衛事故也八月
加食邑八百戶實封一百戶旌為政之效也十月明宗
幸汴以帝為御營使車駕次京水飛報汴州節度使朱
守殷叛明宗命帝董親軍倍道星行信宿及浚城一戰
而拔之尋以帝為宣武軍節度使侍衛親軍步軍都指

揮使兼六軍諸衛副使進封開國公加食邑五百戶賜
耀忠匡定保節功臣四月車駕還洛制加檢校太傅同
中書門下平章事興唐尹鄴都留守天雄軍節度使五
月丁未加駙馬都尉長興元年二月明宗南郊禮畢加
檢校太尉增食邑五百戶尋詔歸任時鄴都繁富為天
下之冠而土俗獷悍民多爭訟帝令投函府門一一覽
之及踰年盈積几案滯于獄者甚衆時論以此減之九
月東川董璋叛朝廷命帝為東川行營都招討使兼知

東川行府事十月至自魏博董衆西征二年春以川路
險艱糧運不繼詔班師四月復兼六軍諸衛副使六月
改河陽節度使仍兼兵柄是時秦王從榮奏伏見北面
頻奏報契丹族移帳近塞吐渾突厥已侵邊地戍兵雖
多未有統帥早宜命大將一人以安雲朔明宗曰卿等
商量從榮與諸大臣奏曰將校之中惟石敬瑭康義誠
二人可行帝素不欲為禁軍之副即奏曰臣願此行明
宗曰卿為吾行事無不濟及受詔不落六軍副使帝復

遷延辭避十一月乙酉明宗復謂侍臣曰雲州奏契丹自幽州移帳言就放牧終冬不退其患深矣樞密使范延光奏曰已議石敬瑭與康義誠北行然其定奪即在宸旨帝奏曰臣雖不才爭敢避事但進退惟命明宗曰卿為吾行甚叶衆議由是遂定丁亥加兼侍中太原尹北京留守河東節度使兼大同振武彰國威塞等軍蕃漢馬步軍總管改賜竭忠匡運寧國功臣翼日宴于中興殿帝捧觴上壽因奏曰臣雖微怯惟邊事敢不盡其

忠力但臣遠違玉階無以時申補報帝因再拜告辭明
宗泣下霑衿左右怪其過傷果與帝因此為訣不復相
見矣十二月明宗晏駕帝聞之長慟若喪考妣應順元
年正月閔帝即位加中書令及增食邑帝性簡儉未嘗
以聲色滋味輒自燕樂每公退必召幕客論民間利害
及刑政得失明而難犯事多親決有店婦與軍士訟云
曝粟于門為馬所食而軍士懇訴無以自明帝謂鞠吏
曰兩訟未分何以為斷可殺馬刳腸而視其粟有則軍

士誅無則婦人死遂殺馬馬腸無粟因戮其婦人境內

肅然莫敢以欺事言者三月移鎮常山所歷方鎮以孝

治為急見民間父母在昆弟分索者必繩而殺之勤于

吏事廷無滯訟常山屬邑曰九門有人鬻地與異居兄

議價不定乃移于他人他人須兄立券兄固抑之因訴

于令令以弟兄俱不義送府帝監之曰人之不義由牧

長新至教化所未能及吾甚愧焉若以至理言之兄利

良田弟求善價順之則是沮之則非其兄不義之甚也

宜重筭焉市田以高價者取之上下服其明及岐陽兵亂推潞王為天子閔帝急詔帝赴闕欲以社稷為託閔帝自洛陽出奔于衛相遇于途遂與閔帝迴入衛州時閔帝左右將不利于帝帝覺之因擒其從騎百餘人閔帝知事不濟與帝長慟而別帝遣刺史王宏贄安置閔帝于公舍而去尋為潞王所害帝後長以此愧心焉清泰元年五月復授太原節度使北京留守充大同振武彰國威塞等軍蕃漢馬步總管二年夏帝屯軍于忻州

朝廷遣使送夏衣傳詔撫諭後軍人遽呼萬歲者數四
帝懼斬挾馬將李暉已下三十餘人以徇乃止三年五
月移授鄆州節度使進封趙國公仍改扶天啟運中正
功臣尋降詔促帝赴任帝心疑之乃召僚佐議曰孤再
受太原之日主上面宣云與卿北門一生無議除改今
忽降此命莫是以去年忻州亂兵見迫過相猜乎又今
年千春節公主入覲當辭時謂公主曰爾歸心甚急欲
與石郎反耶此疑我之狀固且明矣今天子用后族委

邪臣沈湎荒忽萬機停壅失刑失賞不亡何待吾自應
順中少主出奔之日覩人情大去不能扶危持顛憤憤
于方寸者三年矣今我無異志朝廷自啟禍機不可安
然死于道路況太原險固之地積粟甚多若且寬我我
當奉之必若加兵我則外告鄰方北構強敵興亡之數
皎皎在天今欲發表稱疾以俟其意諸公以為如何

玉堂

閒話晉祖在并部嘗啟容謂賓佐云近因晝寢忽夢若
頃年在洛京時與天子連鑣于路退舊第天子請某入
其第某遜讓者數四不得已即促轡而入至廳事下馬
升自階西向而坐天子已馳車去矣其夢如此羣僚

莫敢有所答是年冬果有鼎革之事攷晉祖懷不軌之志久矣故託夢以惑衆也

掌書記桑維

翰都押衙劉知遠贊成密計遂拒末帝之命朝廷以帝

不奉詔降制削奪官爵即詔晉州刺史北面副招討使

張敬達領兵圍帝于晉陽帝尋命桑維翰詣諸道求援

契丹遣人復書諾之約以中秋赴義

遼史太宗紀云七月丙申唐河東節

度使石敬瑭為其主所討遣趙瑩求救時趙德鈞亦遣使至河東後遣桑維翰來告急遂許興師八月庚午自

將以援敬瑭

六月北面招收指揮使安重榮以部曲數千人

入城七月代州屯將安元信率一軍與西北面先鋒指

揮使安審信引五百騎俱至八月懷州彰聖軍使張萬迪等各率千餘騎來降是月外衆攻我甚急帝親當矢石人心雖固廩食漸困九月辛丑契丹主率衆自鴈門而南旌旗不絕五十餘里

遼史九月丁酉入鴈門戊戌次忻州己亥次太原

先

使人報帝云吾欲今日便破賊可乎帝使人馳告曰皇帝赴難比要成功賊勢至厚可明旦穩審戰議未為晚也使未達契丹已與南軍騎將高行周符彥卿等合戰時張敬達楊光遠列陣西山下士未及成伍而行周彥

卿為伏兵所斷舍軍而退敬達等步兵大敗死者萬人

是夜帝出北門與戎王相見戎王執帝手曰恨會面之

晚因論父子之義

遼史敬瑭率官屬來見帝執手撫慰之契丹國志云敬瑭見契丹帝問曰

皇帝遠來士馬疲倦遽與唐大戰而勝何也帝曰始我謂唐必斷鴈門諸路伏兵險要不可得進使人偵視皆

無之是以長驅而深入我氣方銳乘此擊之是以勝之敬瑭歎服

明日帝與契丹圍敬

達營寨南軍不復出矣帝與契丹本無結好自末帝見

迫之後遣腹心何福以刀錯為信一言親赴其難迅若

流電信天意耶已酉唐末帝率親軍步騎三萬出次河

橋辛亥末帝詔樞密使趙延壽分衆二萬為北面詔討
使又詔魏博節度使范延光統本軍二萬人屯遼州十
月幽州節度使趙德鈞領所部萬餘人自上黨吳兒谷
合延壽兵屯團栢谷與敬達寨相去百里彌月竟不能
相通遼史初圍晉安分遣精兵守其要害以絕援兵之路趙延壽等皆逗留不進十一月戎

王會帝于營謂帝曰我三千里赴義事湏必成觀爾體
貌恢廓識量深遠真國主也天命有屬時不可失欲徇
蕃漢羣議冊爾為天子帝飾讓久之既而諸軍勸請相

繼乃命築壇于晉陽城南冊帝為大晉皇帝戎王自解

衣冠授焉

遼史太宗紀十一年冬十月甲子封敬瑭為晉王十一月丁酉冊敬瑭為大晉皇帝

文

曰維天顯九年歲次丙申十一月丙戌朔十二日丁酉
大契丹皇帝若曰於戲元氣肇開樹之以君天命不恒
人輔惟德故商政衰而周道盛秦德亂而漢圖昌人事
天心古今靡異咨爾子晉王神鍾睿哲天贊英雄叶夢
日以儲祥應澄河而啟運迨事數帝歷試諸艱武畧文
經迺由天縱忠規孝節固自生知猥以眇躬奄有北土

暨明宗之享國也與我先哲王保奉明契所期子孫順承患難相濟丹書未泯白日難欺顧予纂承匪敢失墜爾惟近戚實係本枝所以予視爾若子爾待予猶父也朕昨以獨夫從珂本非公族竊據寶圖棄義忘恩逆天暴物誅剪骨肉離間忠良聽任矯諛威虐黎獻華夷震悚內外崩離知爾無辜為彼致害敢徵衆旅來逼嚴城雖併吞之志甚堅而幽顯之情何負達予聞聽深激憤驚乃命興師為爾除患親提萬里遠殄羣兇但赴急難

罔辭艱險果見神祇助順卿士協謀旗一麾而棄甲平
山鼓三作而殪屍遍野雖以遂予本志快彼羣心將期
稅駕金河班師玉塞矧今中原無主四海未寧茫茫生
民若墜塗炭況萬幾不可以暫廢大寶不可以久虛拯
溺救焚當在此日爾有庇民之德格于上下爾有戡難
之勲光于區宇爾有無私之誠通乎神明爾有不言之
信彰乎兆庶予懋乃德嘉乃丕績天之厯數在爾躬是
用命爾當踐皇極仍以爾自茲并土首建義旗宜以國

號曰晉朕永與為父子之邦保山河之誓於戲補百王之闕禮行茲盛典成千載之大義遂我初心爾其永保兆民勉持一德慎乃有位允執厥中亦惟無疆之休其誠之哉禮畢帝鼓吹道從而歸始梁開國之歲即前唐天祐四年也潞州行營使李思安奏壺關縣庶穰鄉鄉人伐樹樹倒自分兩片內有六字如左書云天十四載石進梁祖令藏于武庫然莫詳其義至帝即位識者曰天字取四字中兩畫加之于旁則丙字也四字去中之

兩畫加十字則申字也帝即位之年乃丙申也又易云
晉者進也國號大晉皆符契焉又帝即位之前一年歲
在乙未鄴西有柵曰李固清淇合流在其側柵有橋橋
下大鼠與蛇鬪鬪及日之申蛇不勝而死行人觀者數
百識者志之後唐末帝果滅于申又末帝真定常山人
也有先人舊廬其側有古佛剎剎有石像忽搖動不已
人皆異之及重圍晉陽帝遣心腹何福輕騎求援北蕃
蕃主自將諸部赴之不以繒帛不以珠玉若響應聲謂

福曰吾已兆于夢皆上帝命我非我意也

契丹國志引紀異錄云契

丹主德光常晝寢夢一神人花冠美姿容輜輶甚盛忽自天而下衣白衣佩金帶執鎬錄有異人十二隨其後由一黑兔入德光懷而失之神人語德光曰石郎使人喚汝汝須去覺告其母母忽之不以為異後復夢即前神人也衣冠儀貌儼然如故曰石郎已使人來喚汝既覺而驚復以告母母曰可命筮乃召巫筮言太祖從西樓來云中國當立天王要爾為助爾須去未決旬唐石敬瑭反于河東為後唐張敬達所敗亟遣趙瑩持表重賂許割燕雲求兵為援契丹主曰我非為石郎興師乃奉天帝敕使也

時援兵未至偽將

張敬達引軍逼城設柵柵將成忽有大風暴雨柵無以立後築長城城就又為水潦所壞城終不能合晉陽有

北宮宮城之上有祠曰毗沙門天王帝曾焚修默而禱之經數日城西北闔正受敵處軍候報稱夜來有一人長丈餘介金執戣行于城上久方不見帝心異之又牙城有僧坊曰崇福坊之廡下西北隅有泥神神之首忽一日有煙生其騰郁如曲突之狀坊僧奔赴以為人火所延及俯而視之無所有焉事尋達帝帝召僧之臘高者問焉僧曰貧道見莊宗將得天下曾有此煙觀此噴湧甚于當時兆可知矣自此日旁多有五色雲氣如蓮

芟之狀帝召占者視之謂曰此驗應誰占者曰見處為
瑞更應何人又帝每詰旦使慰撫守陴者率以為常忽
一夕已暝城上有號令之聲聲不絕者三帝使人問之
將吏云從上傳來者皆知神助時城中復有數家井泉
暴溢不止及蕃軍大至合勢破之末帝之衆似拉朽焉
斯天運使然非人力也是日帝言于戎王願以鴈門已
北及幽州之地為戎王壽仍約歲輸帛三十萬戎王許
之

舊五代史卷七十五

舊五代史卷七十五考證

晉書高祖紀一本衛大夫碯漢丞相奮之後○案歐陽史作其姓石氏不知其得姓之始

皇考諱紹雍○紹雍原本作詔雍考五代會要歐陽史俱作紹雍今改正

命帝領親騎號三討軍○三討軍歐陽史作左射軍
乃命築壇于晉陽城南○案通鑑作築壇于柳林遼史
亦作設壇晉陽

歲次丙申十一月丙戌朔十二日丁酉○案通鑑考異引廢帝實錄契丹立晉誤在閏月丁卯辨正在唐紀歐陽史及通鑑並從晉紀作十一月丁酉

四字去中之兩畫○案原本作中去之兩畫今從冊府元龜改正

帝遣心腹何福輕騎求援北蕃○案原本闕帝遣心腹四字今從冊府元龜增入

舊五代史卷七十五考證

欽定四庫全書薈要卷五千四百七十七

舊五代史卷七十六

宋門下侍郎參知政事監修國史薛居正等撰

書第二

高祖紀二

天福元年十一月己亥帝御北京崇元殿降制改長興
七年為天福元年大赦天下十一月九日昧爽已前應
在京及諸州諸色罪犯及曾授偽命職掌官吏并見禁



囚徒已結正未結正已發覺未發覺罪無輕重常赦不
原者咸赦除之應明宗朝所行敕命法制仰所在遵行
不得改易其在京鹽貨元是官場出糴自今後並不禁
斷一任人戶取便糴易仍下太原府更不得開場糴貨
其麴每斤與減價錢三十文以節度判官趙瑩為翰林
學士承旨守尚書戶部侍郎知河東軍府事以節度掌
書記桑維翰為翰林學士守尚書禮部侍郎知樞密院
事以觀察判官薛融為吏部郎中兼侍御史知雜事太

原縣令羅周岳為左諫議大夫節度推官竇貞固為翰林學士京城都巡檢使劉知遠為侍衛馬軍都指揮使客將景延廣為步軍都指揮使太原少尹李玘為尚書工部侍郎閏十一月甲子晉安寨副招討使楊光遠等殺上將張敬達以諸軍來降丙寅制以翰林學士承旨知河東軍府戶部侍郎知制誥趙瑩為門下侍郎同中書門下平章事監修國史以翰林學士權知樞密事禮部侍郎知制誥桑維翰為中書侍郎同中書門下平章

事集賢殿大學士依前知樞密院事竝賜推忠興運致
理功臣甲戌車駕至昭義受趙德鈞延壽降是日戎王
舉酒言於帝曰予遠來赴義大事已成皇帝須赴京都
今令大詳袞勒兵相送至河梁要過河者任意多少予
亦且在此州俟京洛平定便當北轅執手相泣久不能
別脫白貂裘以衣帝贈細馬二十匹戰馬一千二百匹
仍誡曰子子孫孫各無相忘己卯至河陽北節度使萇
從簡來降舟楫已具庚辰望見洛陽煙火相次有將校

飛狀請進辛巳唐末帝聚其族與親將宋審虔等登玄武樓縱火自焚而死至晚車駕入洛唐兵解甲待罪皆慰而舍之帝止潛龍舊第百官稍稍見焉詔御史府促朝官入見詔文武兩班臣僚應事偽廷者竝釋罪是日百辟謝恩於宮門之外甲申車駕入內御文明殿受朝賀用唐禮樂制大赦天下應中外諸色職掌官吏內曾有受偽命者一切不問偽廷賊臣張延朗劉延皓劉延朗等竝姦邪害物貪猥弄權罪既滿盈理難容貸除此

三人已行敕命指揮外其有宰臣馬肩孫樞密使房暉
宣徽使李專美河府節度使韓昭胤等四人竝令釋放
少帝宜令中書門下追尊定諡擇日禮葬妃孔氏宜行
追冊祔葬應天下節度使刺史下賓席郡職及將校等
委中書門下各與改轉官資其北京管內鹽鐺戶合納
逐年鹽利昨者偽命指揮每斗須令人戶折納白米一
斗五升極知百姓艱苦自今後宜令人戶以元納食鹽
石斗數目每斗依時價計定錢數取人戶便穩折納斛

斗其洛京管內逐年所配人戶食鹽起來年每斤特與減價錢十文應諸道商稅仰逐處將省司合收稅條例榜於本院前榜內該設名目者即得收稅十二月乙酉朔幸河陽餞送大詳袞蕃部兵士歸國詔降末帝為庶人丁亥制以司空馮道守本官兼門下侍郎平章事弘文館大學士以步軍都指揮使符彥饒為滑州節度使以河陽節度使萇從簡為許州節度使以澤州刺史劉凝為華州節度使以皇子重乂為河南尹庚寅以滑州

節度判官石光贊為宗正卿辛卯以舊相姚顗為刑部
尚書時自秋不雨經冬無雪命羣官徧加祈禱癸巳以
邠州節度使張希崇為靈武節度使鄧州節度使皇甫
遇為定州節度使詔國朝文物制度起居入閣宜依唐
明宗朝事例施行鎮州衙內都虞候祕瓊作亂逐副使
李彥琦殺都指揮使胡章同州小校門鐸殺節度使楊
漢賓燒劫州城丙申帝為明宗皇后曹氏薨舉哀於長
春殿輟朝三日詔封故東丹王李贊華為燕王遣前單

州刺史李肅部署歸葬本國以右拾遺吳涓為左補闕
充樞密院學士己亥以汴州節度使李周充西京留守
以前河中節度使李從璋為鄧州節度使磁州奏草寇
攻城三日而退庚子帝為皇弟故彰聖指揮使敬殷沂
州指揮使敬德檢校太子賓客敬友舉哀於長春殿以
舊相盧文紀為吏部尚書以皇城使周環為大將軍充
三司使以左贊善大夫馬重績為司天監青州奏節度
使房知溫卒詔鄆州王建立以所部牙兵往青州安撫

中書門下奏請以來年二月二十八日帝慶誕日為天和節從之

天福二年春正月甲寅朔帝御文明殿受朝賀仗衛如式乙卯日有蝕之是夜有赤白氣相間如耕墾竹林之狀自亥至丑生北濁過中天明滅不定徧二十八宿徹曙方散丁巳故皇弟敬德敬殷竝贈太傅皇子重裔重進重英竝贈太保右神武統軍康思立卒輟視朝贈太子少師是日詔曰唐莊宗陵名與國諱同宜改為伊陵

應京畿及諸州縣舊有唐朝諸帝陵并真源等縣竝不為次赤卻以畿甸緊望為定其逐處縣令不得以陵臺結銜考滿日依出選門官例指揮隔任後準格例施行其宋州亳州節度使刺史落太清宮使副名額庚申以前吏部郎中兼侍御史知雜事王松為左諫議大夫水部郎中王易簡本官知制誥定州奏契丹改幽州為南京中書奏請立宗廟從之以翰林學士工部侍郎和凝為禮部侍郎依前充職詔内外文武臣僚竝與加恩皇

基初造示普恩也太子少保致仕華溫琪卒贈太子太保是日詔應朝臣中有籍才特除外任者秩滿無遺闕將來擬官之時在外一任同在朝一任升進其就便自求外職及不是特達選任者不在此限安州上言節度使盧文進殺行軍副使率部下親兵過淮以前天平軍節度使檢校太尉兼侍中王建立為平盧軍節度使以守司空門下侍郎平章事弘文館大學士馮道兼諸道鹽鐵轉運等使天雄軍節度使兼中書令范延光改封

秦國公加食邑實封鳳翔節度使兼中書令西平王李
從暉加食邑實封乙丑以端明殿學士禮部侍郎呂琦
為檢校工部尚書祕書監丙寅改中興殿為天福殿門
名從之湖南節度使楚王馬希範加食邑實封改賜功
臣名號前昭義節度使檢校太傅同平章事高行周起
復右金吾衛大將軍依前昭義軍節度使泰寧軍節度
使李從溫荆南節度使南平王高從誨歸德軍節度使
趙在禮並加食邑實封改功臣名號以端明殿學士戶

部侍郎李崧為兵部侍郎判戶部以左諫議大夫王松
判度支魏府范延光奏當管夏津鎮捕賊兵士誤殺卻
新齊州防禦使祕瓊初延光將萌異志使人潛結於瓊
諾之及是以瓊背其謀密使精騎殺之由是延光反狀
明矣以工部侍郎李玘檢校右僕射為汾州刺史以前
彰國軍節度使尹暉為左千牛衛上將軍是日詔曰西
天中印度摩竭陀舍衛國大菩提寺三藏阿闍梨沙門
室利縛囉宜賜號弘梵大師庚午涇州節度使李德琬

徐州節度使安彥威秦州節度使康福延州節度使劉
景巖襄州節度使安從進夏州節度使李彝殷竝加食
邑實封壬申正衙備禮冊贈故皇弟皇子等丙子故契
丹人皇王歸葬輟視朝一日改汴州雍邱縣為杞縣避
廟諱也戊寅以兵部侍郎判戶部李崧為中書侍郎同
中書門下平章事充樞密使以權知樞密使事中書侍
郎同中書門下平章事集賢殿學士桑維翰為樞密使
是日詔曰應天開國恭己臨人宜覃繼絕之恩以廣延

洪之道宜於唐朝宗屬中取一人封公世襲兼隋之鄜

公為二王後以後周介公備三恪主其祭祀及赴大朝

會五代會要載原敕云其唐朝宗屬中舊在朝及諸道為官者各據資歷考限滿日從品秩序遷已有出身

任令參選以前鎮國軍節度使皇甫立為神武統軍以前宗

正卿李郁為太子賓客庚辰以吏部侍郎龍敏判戶部

二月丙戌以尚食使安友規充葬明宗皇后監護使以

河陽節度使安審暉為鄜州節度使癸巳詔停北京西

北面計度司事吳越國王錢元瓘加食邑實封改賜功

臣名號己亥詔應諸道行軍副使等得替後且就私家
取便安止限一年後方得赴闕當便與比擬壬寅詔應
諸道馬步都虞候自今後朝廷更不差補委自藩方於
本州衙前大將中慎選久歷事任曉會刑獄者充以三
年限仍不得於元隨職員內差補以左散騎常侍孔昭
序為太子賓客尚書左僕射劉昫右僕射盧質竝加食
邑實封甲辰以滄州留後馬全節為橫海軍節度使以
太子賓客韓憚為貝州刺史左羽林統軍羅周敬為右

金吾衛上將軍丙午以皇子左驍衛上將軍重信為檢校太保河陽三城節度使以權知河陽軍州事周瓌為安州節度使詔中外臣僚或因差使出入竝不得薦屬人於藩鎮希求事任如有犯者竝準唐長興二年敕條處分戊申中書舍人陳乂改左散騎常侍應在朝文武百僚及見任刺史先代未封贈者與加封贈母妻未敘封者竝與敘封辛亥天和節帝御長春殿召左右街僧錄威儀殿內譚經循舊式也三月甲寅制北京留守太

原尹皇子重貴封食邑三百戶刑部侍郎張鵬改兵部侍郎已未御史臺奏唐朝定令式南衙常參文武百僚每日朝退于廊下賜食謂之常食自唐末亂離常食漸廢仍于入閣起居日賜食每入閣禮畢閣門宣放仗羣官俱拜謂之謝食至僞主清泰年中入閣禮畢更差中使至正衙門口宣賜食百官立班重謝此則交失唐朝賜食之意于禮實為太煩臣恐因循漸失根本起今後入閣賜食望不差中使口宣準唐明宗朝事例處分從

之五代會要載其年四月御史臺奏文武百官每月朔望入閣禮畢賜廊下食在京時祇于廟堂幕次兩廊下今在行朝于正衙門外權為幕次房廊隘狹伏恐五月一日朝會禮畢準例賜食于幕次難為排比伏見唐明宗時兩省官于文明殿前廊下賜食今未審入閣日權于正衙門內兩廊下排比賜食為復別有處分敕宜依明宗時舊規廊下賜食中書奏準敕故庶人三月七日以王禮葬

其妻男等竝以禮葬請輟其日朝參一日從之以宣徽南院使楊彥詢為左監門衛上將軍依前充宣徽使充川李從溫奏節度副使王謙搆軍士作亂尋已處置丙寅詔王者省方設教靡憚于勤勞養士撫民必從其宜

便顧惟涼德肇啓丕圖常務去于煩苛冀漸臻于富庶
念京城俶擾之後屬舟船焚蕪之餘饋運頓虧支費殊
闕將別謀于飛輓慮轉困于生靈以此疚心未嘗安席
今以夷門重地梁苑雄藩水陸交通舟車畢集爰資經
度須議按巡寧免暫勞所期克濟取今月二十六日巡

幸汴州云

通鑑范延光聚卒結兵悉召巡內刺史集魏
州將作亂會帝謀徙都大梁桑維翰曰大梁

北控燕趙南通江淮水陸都會資用富饒今延光反形
已露大梁距魏不過十驛波若有變大軍尋至所謂疾
雷不及掩耳也丙寅下詔託以前貝州刺史史圭為刑
以洛陽漕運有關東巡汴州

部侍郎充諸道鹽鐵轉運副使前澤州刺史閻至為戶部侍郎詔車駕經過州府管界所有名山大川帝王陵廟名臣墳墓路十里者宜令本州排比祇候駕經過日以酒脯祭告左僕射劉昫等議立宗廟以立高祖已下四親廟其始祖一廟伏候聖裁御史中丞張昭遠議請依隋唐之制立四廟推四世之中名位高者為太祖詔下百官定議百官請依唐制追尊四廟為定從之甲戌以右龍武統軍楊思權為左衛上將軍乙亥前鄜州節

度使張萬進加檢校太傅前宋州節度使李從敏加檢校太尉以吏部郎中兼侍御史知雜事薛融為左諫議大夫以兵部郎中段希堯為右諫議大夫戊寅以戶部尚書王權為兵部尚書工部尚書崔居儉為戶部尚書兵部尚書李鱗為太子少保兵部尚書致仕裴皞為工部尚書東上閤門使李守貞為右龍武將軍充職庚辰車駕離京四月癸未朔至鄭州防禦使白景友進牲餼器四帝曰不出民力否景友曰臣畏陛下法皆辦于已

俸命收之甲申駕入汴州丁亥制應天福二年四月五日昧爽已前諸道州府見禁囚徒大辟已下罪無輕重竝釋放天福元年已前諸道州府應係殘欠租稅竝特除免諸道係徵諸色人欠負省司錢物宜令自偽清泰元年終已前所欠者據所通納到物業外竝與除放昨者行至鄭州滎陽縣界路旁見有蟲食及旱損桑麥處委所司差人檢覆量與蠲免租稅河陽管內酒戶百姓應欠天福元年閏十一月二十五日已前不敷年額麴

錢竝放其諸處應經兵火者亦與指揮當罪卽誅式明
常典既往可憫宜示深仁偽清泰中臣僚内有從誅戮
者竝許收葬天下百姓有年八十已上者與免一子差
徭仍逐處簡署上佐官梁故滑州節度使王彥章効命
當時致身所事稟千年之生氣流百代之令名宜令起
贈太師子孫量才敘錄應諸道州府管界有自偽命抽
點鄉兵之時多是結集劫盜因此畏懼刑章藏隱山谷
宜令逐處曉諭招攜各令復業自今年四月五日已前

為非者一切不問如兩月不歸業者復罪如初丁酉宣武軍節度使侍衛親軍使楊光遠加兼侍中己亥陝州節度使侍衛都虞候劉知遠加檢校太保庚子北京鄴都徐兗二州竝奏旱詔今後立妃及拜免三公宰相及命將封親王公主宜令竝降制命餘從令式處分夏五月壬子朔帝御崇元殿受朝賀仗衛如式詔洛京魏府管内所徵今年夏苗稅麥等宜放五分之一以徵旱故也丙辰御史中丞張昭遠奏汴州在梁室朱氏稱制之

年有京都之號及唐莊宗平定河南復廢為宣武軍至
明宗行幸之時掌事者因緣修葺衙城遂挂梁室時宮
殿門牌額當時識者或竊非之一昨車駕省方暫居梁
苑臣觀衙城內齋閣牌額一如明宗行幸之時無都號
而有殿名恐非典據臣竊尋秦漢已來寰海之內鑾輿
所至多立宮名近代隋室于揚州立江都宮太原立汾
陽宮岐州立仁壽宮唐朝于太原立晉陽宮同州立長
春宮岐州立九成宮宮中殿閣皆題署牌以類皇居請

準故事于汴州衙城門權挂一宮門牌額其餘齋閣竝可取便為名敕行闕宜以大寧宮為名湖南青草廟舊封安流侯進封廣利公洞庭廟進封靈濟公磊石廟舊封昭靈侯進封威顯公黃陵二妃廟舊封懿節廟改封昭烈廟從馬希範之請也戊午以前成德軍節度判官張彭為太府卿壬戌詔在朝文武臣僚每人各進封事一件仍須實封通進務裨闕政用副虛懷甲子以虞部郎中知制誥于嶠為中書舍人以戶部郎中于邁為虞

部郎中知制誥故太子少保致仕朱漢賓贈司空乙丑

六宅使王繼弘送義州衙前收管前洺州團練使高信

送復州收管二人于崇禮門內喧爭為臺司所劾故也

戊辰翰林學士戶部員外郎知制誥竇貞固改工部郎

中知制誥翰林學士都官郎中知制誥李慎儀改中書

舍人仍賜金紫竝依舊充職庚午制封皇第二十一女

為長安公主封皇第十一妹烏氏為壽安長公主皇第

十二妹史氏為永壽長公主皇第十三妹杜氏為樂平

長公主壬申天雄軍節度使守太傅兼中書令興唐尹

范延光進封臨清王加食邑三千戶鳳翔節度使檢校

太師兼中書令西平王李從暉進封岐王丙子平盧軍

節度使兼中書令王建立進封臨淄王昭信軍節度使

侍衛馬軍都指揮使景延廣改寧江軍節度使典軍如

故太常卿梁文矩奏定四廟謚號廟號陵號太常少卿

裴垣奏定四廟皇后追尊謚號從之戊寅以中書舍人

權知貢舉王延為御史中丞以翰林學士戶部侍郎知

制誥崔棣為兵部侍郎充承旨以翰林學士承旨兵部侍郎程遜為檢校禮部尚書太常卿以檢校禮部尚書太常卿梁文矩為吏部尚書以御史中丞張昭遠為戶部侍郎以吏部尚書盧文紀為太子少傅已卯詔太社內先收掌唐朝罪人首級等宜令骨肉或先舊僚屬收葬其喪葬儀注不得過制六月壬午朔制宗正卿石光贊奏滎陽道左有萬石君石奮之廟德行懿美宜示封崇用光遠祖之徽猷益茂我朝之盛典贈奮太傅癸未

契丹使伊勒希巴來聘致馬二百匹及人參貂鼠皮走馬木碗等物乙酉翰林學士司封員外郎知制誥王仁裕改都官郎中右贊善大夫盧損改右散騎常侍前有朝貶故也以祕書少監致仕劉頎為鴻臚卿致仕前光祿少卿尹玉羽以少府監致仕丙戌宰臣李崧上表讓樞密使于趙瑩以瑩佐命之元臣也詔不允以前義成軍節度使李彥舜為左武衛大將軍以左散騎常侍唐洎為檢校禮部尚書國子祭酒以前左龍武統軍李承

約為左驍衛上將軍戊子宰臣趙瑩自契丹使迴癸巳
東都奏瀝澗河溢壞金沙灘內舍屋幽州趙思溫奏瀛
莫兩州元係當道其刺史常行周白彥球乞發遣至臣
本府詔遣行周等赴闕甲午六宅使張言自魏府迴奏
范延光叛命滑州符彥饒飛奏有兵士自北來傳范延
光到黎陽乞發兵屯禦宣遣客省使李守貞往延光所
問罪尋命護聖都指揮使白奉進領騎士一千五百赴
白馬渡巡檢乙未魏府范延光男閑廐使守圖送御史

臺攝荆南節度行軍司馬檢校太保歸州刺史王保義
加檢校太傅知武泰軍節度觀察畱後充荆南行軍司
馬兼沿淮巡檢使襄州奏江水漲一大二尺丁酉遣內
班史進能押信箭一對往滑州賜符彥饒以前磁州刺
史劉審交為魏府計度使以東都巡檢使張從賓充魏
府西南面都部署遣侍衛使楊光遠領步騎一萬赴滑
州以東都副畱守張延播充洛京都巡檢使白奉進奏
捉得賊卒張柔稱范延光差澶州刺史馮暉充一行都

部署元從都押衙孫銳充一行兵馬都監帝覽奏謂侍

臣曰朕雖寡德寡謀自謂不居延光之下而馮暉孫銳

過于兒戲朝夕就擒安能抗拒大軍為我之患乎天平

軍節度使安審琦起復舊任翰林學士禮部侍郎和凝

改端明殿學士乙巳范延光差牙將王知新齎表到關

不令朝見收付武德司丁未詔侍衛使楊光遠充魏府

西面都部署以張從賓充副兼諸軍都虞候昭義節度

使高行周充魏府西面都部署是日張從賓亦叛與范

延光協謀害皇子河陽節度使重信皇子東都畱守重

乂己酉以奉國都指揮使侯益護聖都指揮使杜重威

領步騎五千往屯汜水關備從賓之亂也

通鑑七月張從賓攻汜水

關殺巡檢使宋廷浩帝戎服嚴輕騎將奔晉陽以避之

桑維翰叩頭苦諫曰賊鋒雖盛勢不能久請少待之不

可輕動

帝乃止七月辛亥兩浙錢元瓘奏弟吳越士客馬步諸

軍都指揮使靜海軍節度使元球非時入府欲謀為亂

腰下搜得匕首已誅戮訖詔削元球在身官爵甲寅奉

國都指揮使馬萬奏滑州節度使符彥饒作亂屠害侍

衛馬軍都指揮使白奉進尋以所部兵擒到彥饒差立功都虞候方太押送赴闕尋賜死于路是日削奪范延光在身官爵以馬萬為滑州節度使以昭義節度使高行周為河南尹東都畱守充西面行營諸軍都部署以護聖左右廂都指揮使杜重威為昭義節度使兼侍衛馬軍都指揮使充西面行營副部署以奉國都指揮使侯益為河陽節度使以右神武統軍王周充魏府行營步軍都指揮使以滑州節度使馬萬充魏府行營馬軍

都指揮使以左僕射劉昫充東都畱守兼判河南府事

杜重威等奏收下汜水關破賊千人張從賓及其殘黨

奔投入河兼收到護聖指揮使曹再晟一百人騎稱背

賊投來竝送赴行闕升貝州為防禦使額皇子故東都

畱守重又贈太傅皇子故河陽節度使重信贈太尉敕

朋助張從賓逆人張延播張繼祚等十人宜令收捕親

的骨肉竝處斬下卯以唐開府儀同三司守太尉兼中

書令西平王李晟五代孫臧為耀州司戶參軍示勸忠

之義也壬申帝御崇元殿備禮冊四廟親授寶冊于使
攝太尉守司空門下侍郎平章事馮道使副攝司徒守
工部尚書裴皞赴洛京行禮甲戌以宰臣趙瑩判戶部
以吏部侍郎判戶部龍敏為東都副畱守詔洛京畱司
百官竝赴關安州軍亂指揮使王暉害節度使周瓌于
理所遣右衛上將軍李金全領千騎赴安州八月辛巳
以許州節度使裴從簡為徐州節度使以陝州節度使
侍衛馬步軍都虞候劉知遠為許州節度使以權北京

畱守徐州節度使安彥威為太原尹北京畱守河東節度使宰臣監修國史趙瑩奏請循近例依唐明宗朝凡有內廷公事及言動之間委端明殿學士或樞密院學士侍立寃旒繫日編錄逐季送當館其百司公事亦望逐季送當館旒要編修日歷從之丁亥以前宋州節度使李從敏為陝州節度使戊子以尚書左丞鄭韜光為戶部尚書致仕改立德殿為廣政殿門名從之庚子華州奏渭河泛溢害稼宰臣馮道加開府儀同三司食邑

實封左僕射劉昫加特進兼鹽鐵轉運等使故東京畱
守判官李遐可贈右諫議大夫其母田氏封京兆郡太
君子孫量才敘錄仍加賻贈長給遐在身祿俸終母之
世先是遐監左藏庫于洛陽會張從賓叛令強取錢帛
遐拒而不與因而遇害故有是命乙巳詔天下見禁囚
徒除十惡五逆放火劫舍持仗殺人合造毒藥官典犯
贓欠負官錢外其餘不問輕重已發覺未發覺已結正
未結正竝從釋放應自張從賓作亂已來有曾被張從

賓及張延播脅從染汙者及符彥饒下隨身軍將等兼

安州王暉徒黨除已誅戮外竝從釋放一切不問張繼祚在喪紀之中承逆豎之意顯從叛亂難貸刑章乃睠先臣實有遺德遽茲之祀深所軫懷其一房家業準法雖已藉沒所有先臣并祖父母墳莊祠堂竝可交付骨肉主張應自梁朝後唐已來前後奉使及北京沿邊管界擄掠往向北人口宜令官給錢物差使齎持往彼收贖於歸本家云繼祚故齊王全義之子也故有是詔丙

午詔天下刑獄繫囚染疾者宜差醫工治療官中量給藥價事輕者仍許家人看候合杖者俟損日決遣九月庚戌朔以前太府卿兼通事舍人陳瓚為衛尉卿兼通事舍人壬子故安遠軍節度使周瓌贈太傅甲寅皇子北京畱守知河東軍府事太原尹重貴加檢校太保為右金吾衛上將軍以右龍武統軍安崇阮為右衛上將軍以前保大軍節度使檢校太傅張萬進為右龍衛軍統軍以右領軍衛上將軍權知安州軍州事李金全為

安遠軍節度使魏府招討使楊光遠進攻城圖戊午以

太子賓客孔昭序為工部尚書致仕將作少監高鴻漸

上言伏覩近年已來士庶之家死喪之苦當殯葬之日

被諸色音聲伎藝人等作樂攪擾求覓錢物請行止絕

從之庚申靜江軍節度使檢校太尉同平章事馬希杲

加階爵及功臣名號以前兵部侍郎楊凝式為檢校兵

部尚書太子賓客故右金吾衛上將軍羅周敬贈太傅

乙丑鄧州節度使李從璋卒贈太師改興唐府為廣晉

府興唐縣為廣晉縣癸酉以左諫議大夫判度支王松
為尚書工部侍郎甲戌貝衛兩州奏河溢害稼乙亥以
將作監王岷為太子賓客十月壬午以宣徽南院使左
監門衛上將軍楊彥詢為鄧州威勝軍節度使詔選人
試判兩道以左司郎中張瑑為右諫議大夫以刑部侍
郎鹽鐵轉運副使史圭為吏部侍郎以曹州刺史宋光
業為宣徽北院使以左金吾衛大將軍高漢筠為左驍
衛大將軍充內客省使以宣徽北院使左驍衛大將軍

劉處讓為左監門衛上將軍充宣徽南院使丙戌遣使
祀五嶽四瀆故天平軍節度使閻寶追封太原郡王故
大同軍節度使李存璋贈太師故瀛州刺史李嗣顧贈
太尉故相州刺史史建瑋故代州刺史王建及竝贈太
保故幽州節度使周德威追封燕王十一月庚戌賜楊
光遠空名官告自司空至常侍凡四十道將士立功者
得補之而後奏中書上言準唐貞元二年九月五日敕
文官充翰林學士及皇太子諸王侍讀武官充禁軍職

事竝不常朝參其在三館等諸職事者竝朝參訖各歸
所務自累朝以來文武在內廷充職兼判三司或帶職
額及六軍判官等例不赴常朝元無正敕準近敕文武
職事官未升朝者按舊制竝赴朔望朝參其翰林學士
侍讀三館職事望準元敕處分其諸在內廷諸司使等
每受正官之時來赴正衙謝後不赴常朝大朝會不離
禁廷位次三司職官免常朝惟赴大朝會其京司未升
朝官員祇赴朔望朝參帶諸司職掌者不在此例文官

除端明殿翰林學士樞密院學士中書省知制誥外有兼官兼職者仍各發遣本司公事從之丙辰太子賓客王岷卒改潞京潛龍宅為廣德宮北京潛龍宅為興義宮戊午中書奏準雜令車駕巡幸所祇承者賜贈竝同京官從之戊辰鎮海鎮東節度使吳越王錢元瓘加天下兵馬副元帥封吳越國王庚午以右拾遺李澣充翰林學士甲戌命太常卿程遜兵部員外郎韋棧充吳越國王加恩使丙子以戶部侍郎張昭遠守本官充翰林

學士仍知制誥丁丑湖南馬希範貢寶裝龍鳳器用結
銀花果子等物帝覽之謂侍臣曰奇巧蕩心斯何用耳
但以來遠之道不欲阻其意聞者服之壬午安州李金
全上言奉詔抽臣元隨左都押衙胡漢筠其人染重病
候損日赴闕漢筠本滑吏也從金全歷數鎮而濫聲誼
聞帝知之欲授以他職免陷功臣漢筠懼其罪遂託疾
由是勸金全貳于朝廷自此始也十二月以監察御史
徐台符為尚書膳部員外郎知制誥以右補闕史官修

撰吳承範為尚書屯田員外郎知制誥左諫議大夫薛
融改中書舍人辭而不拜尚書水部郎中知制誥王易
簡改中書舍人故隴西郡王李嗣昭追封韓王故橫海
軍節度使安審通贈太師辛丑湖南節度使兼中書令
楚王馬希範加食邑實封改賜扶天佐運同德致理功
臣甲辰車駕幸相國寺祈雪

舊五代史卷七十六

舊五代史卷七十六攷證

晉書高祖紀二甲戌車駕至昭義 案歐陽史通鑑並

從是書作甲戌至潞州遼史作辛未與是書異

已卯至河陽北 案是書唐紀作庚辰晉帝至河陽遼

史又作辛巳並與此紀異通鑑作己卯與此紀同

乙卯日有蝕之 案五代春秋作正月乙卯朔日食通

鑑考異引十國紀年蜀人亦以乙卯為朔蓋晉人避

正朝日食故改甲寅朔耳

定州奏契丹改幽州為南京 南京歐陽史作燕京通鑑遼史契丹國志並作南京

安州上言節度使盧文進殺行軍副使率部下親兵過淮 案盧文進棄鎮奔吳通鑑作元年十二月五代春秋歐陽史作二年正月與是書同

洞庭廟進封靈濟公 案洞庭廟不載舊封疑有脫文攷五代會要十國春秋並與是書同

磊石廟舊封昭靈侯進封威顯公 威顯公五代會要

作廣利威顯公

以奉國都指揮使侯益為河陽節度使侯案宋史侯益
傳晉祖召益謂曰宗社危若綴旒卿能為朕死耶益
曰願假銳卒五千人破賊必矣以益為西面行營副
都部署据是書高行周為都部署杜重威為副部署
不言侯益為副都部署與宋史異

杜重威等奏收下汜水關破賊千人張從賓及其殘黨
奔投入河 案宋史侯益傳益率禁兵數千人次虎

牢從賓軍萬餘人夾汜水而陣益親鼓士乘之大敗
其衆擊殺殆盡汜水為之不流從賓乘馬入河溺死
据是書祇言破賊千人與宋史異

安州軍亂指揮使王暉害節度使周瓌於理所 案王
暉害周瓌五代春秋通鑑俱不書曰歐陽史作丙子
是書作甲戌諸史所載俱異

大詳袞舊作大相溫今改 伊勒希巴舊作夷離畢今
改

欽定四庫全書

藝文四庫全書
五
代史

舊五代史卷七十六攷證

欽定四庫全書薈要卷五千四百七十八

舊五代史卷七十七

宋門下侍郎參知政事監修國史薛居正等撰

晉書第三

高祖紀三

天福三年正月戊申朔帝御崇元殿受朝賀仗衛如式
已酉百官守司以太史先奏日蝕故也至是不虧內外
稱賀壬戌是夜以上元張燈于京城縱都人遊樂帝御

大寧宮門樓觀之丙寅端明殿學士禮部侍郎和凝兼
判度支工部郎中判度支王松改尚書刑部侍郎戶部
郎中高延賞改左諫議大夫充諸道鹽鐵轉運副使壬
申以前右諫議大夫薛融為左諫議大夫前興元節度
使張筠卒于西京輟視朝一日

五代會要太常禮院申
準故事前節度使無例

輟朝輟宜特
輟一日朝參

二月庚辰左散騎常侍張允進駁赦論帝

覽而嘉之降詔獎飾仍付史館甲申荆南節度使高從
誨加食邑實封戊子翰林學士李潛賜緋魚袋以尚

書屯田員外郎知制誥吳承範為庫部員外郎充樞密院直學士乙未御札曰曾有宣示百官令進封事今據到者未及十人朕雖無德自行敕後已是數月至子假手于人也合各有一件事敷奏食祿于朝豈當如是言而不用朕所甘心用而不言誰之責也丙申制武清軍節度使馬希萼改威武軍節度使辛丑中書上言禮經云禮不諱嫌名二名不偏諱注云嫌名謂音聲相近若禹與雨邱與區也二名不偏諱謂孔子之母名徵在言

在不稱徵言徵不稱在此古禮也唐太宗二名竝諱玄
宗二名亦同人姓與國諱音聲相近是嫌名者亦改姓
氏與古禮有異廟諱平聲字即不諱餘三聲諱側聲即
不諱平聲字所諱字正文及偏旁闕點畫望依令式施
行詔曰朝廷之制今古相沿道在人弘禮非天降方開
厯數虔奉祖宗雖踰孔子之文未爽周公之訓所為二
名及嫌名事宜依唐禮施行

案太原縣有史匡翰碑立
于天福八年匡翰建瑋之

子也碑于瑋字空文以避諱而建瑋父
敬思仍書敬字蓋當時避諱之體如此

乙巳天和節宴

近臣于廣政殿三月戊午鴻臚卿劉頎卒贈太子賓客
壬戌東上閣門使前司農卿蘇繼顏改鴻臚卿充職回
鶻可汗王仁美進野馬獨峯駝王團碛砂等方物甲戌
永壽長公主薨輟朝一日故涇州節度觀察留後盧順
密贈右驍衛上將軍丁丑詔禁止私下打造鑄瀉銅器
四月丁亥以尚書吏部侍郎盧詹為尚書左丞中書舍
人李詳上疏請沙汰在朝文武臣僚以減冗食仍條貫
藩侯郡守凡遇溥恩不得多奏衙前職員妄邀恩澤疏

奏嘉之戊子宣武軍節度侍衛親軍馬步軍都指揮使
廣晉府行營都招討使楊光遠加兼中書令昭義節度
使侍衛馬軍都指揮使廣晉府行營都排陣使杜重威
河陽節度使兼奉國左右廂都指揮使廣晉府行營馬
步都虞候侯益竝加檢校太傅鳳翔節度使檢校太師
兼中書令岐王李從暉進封秦王平盧軍節度使檢校
太尉兼中書令臨淄王建立進封東平王甲午泰寧軍
節度使李從溫西京留守京兆尹李周歸德軍節度

使趙在禮竝加兼侍中是月諸道藩侯郡守皆等第加
恩改雍熙樓為章和樓避廟諱也五月丁未朔帝御崇
元殿受朝仗衛如式丁巳詔應諸州縣名犯廟諱者竝
改之庚申以楊光遠男承祚為檢校工部尚書左威衛
將軍駙馬都尉丁卯魏府行營步軍都指揮使檢校司
徒右神武統軍王周加檢校太保戊辰故振武節度使
李嗣本贈太尉己巳詔中外臣僚帶平章事侍中中書
令及諸道節度使竝許私門立戟仍竝官給及據官品

依令式處分六月丁丑右監門衛上將軍王彥璘卒甲申以太子詹事王居敏制置安邑解縣兩池榷鹽事左諫議大夫薛融上疏請停修洛京大內優詔褒之尋罷營造庚寅翰林學士尚書工部郎中知制誥竇貞固改中書舍人充職戶部尚書致仕蕭蘧卒贈右僕射詔貢舉宜權停一年以員闕少而選人多常調有淹滯故也丁酉詔尚書司門應管諸闕令丞等宜準唐天成四年四月四日敕本司不得差補祇委闕鎮使鈐轄見差補

者竝畫時勒停訖奏聞應常帶使相節度使自楊光遠
已下凡七人竝改鄉里名號七月丙午朔差左諫議大
夫薛融祕書監呂琦駕部員外郎兼侍御史知雜事劉
皞刑部郎中司徒訓大理正張仁瑒同共詳定唐明宗
朝編敕庚戌御史中丞王延改尚書右丞尚書右丞盧
導改尚書吏部侍郎以左諫議大夫薛融為御史中丞
辛酉製皇帝受命寶以受天明命惟德允昌為文據六
典受命寶者天子修封禪禮神祇則用之其始皆破皇

業錢以製之皇業者藩邸主事之所有也

五代會要天福三年六月

中書門下奏準敕製皇帝受命寶今案唐貞觀十六年太宗文皇帝所刻之璽白玉為螭首其文曰皇帝景命有德者昌敕宜以受天明命惟德允昌為文刻之

壬戌虞部郎中知制誥于邁

改中書舍人宰臣趙瑩桑維翰李崧各改鄉里名號荆南節度使高從誨本貫汴州浚儀縣王畿鄉表節東坊改為擁旌鄉浴鳳里八月戊寅以左僕射劉昫為契丹冊禮使左散騎常侍韋勳副之給事中盧重為契丹皇太后冊禮使壬午魏府軍前奏前澶州刺史馮暉自逆

城來歸定州奏境內旱民多流散詔曰朕自臨寰宇每

念生民務切撫綏期于富庶屬干戈之未戢慮徭役之
或煩惟彼中山偶經夏旱因茲疾苦遽至流移達我聽
聞深懷憫惻應定州所差軍前夫役逃戶夏秋稅並放
甲申襄州奏漢江水漲一丈一尺已丑以前澶州刺史
馮暉為檢校太保充義成軍節度使詔河府同州絳州
等三處災旱逃移人戶下所欠累年殘稅并今年夏稅
差科及麥苗子沿徵諸色錢物等並放其逃戶下秋苗

據見檢到數不計是元額及出利頃畝竝放一半委觀
察使散行曉諭專切攜應歸業戶人仍指揮逐縣切加
安撫翰林學士中書舍人竇貞固上言請令文武百僚逐
司之內各奏舉一人述其人有某能堪為某官某職
據所薦臧否定舉主黜陟

宋史竇貞固傳載此疏略云為國之要進賢是先陛下方

樹丕基宜求多士乞降詔百僚令各司議定一人有何能識堪何職官朝廷依奏用之若能符薦引果謂當才所奏之官望加獎賞如乖其舉或涉徇私所奏之官量加黜罰自然官由德序位以才升三人同行尚聞擇善
十目所視必不濫知臣
疏奏嘉之仍令文武百官于搢
職在論思敢陳狂狷

紳之內草澤之中知灼然有才器者列名以奏宴契丹
冊禮使于廣政殿戊戌鄆州奏陽穀縣界河決青州王
建立奏高麗國宿衛質子王仁翟乞放歸鄉里從之辛
丑鎮邢定三州奏奉詔共差樂官六十七人往契丹詔
魏府城下自屯軍已來墳墓多經斲掘雖已差人收掩
今更遣太僕卿邢德昭往伸祭奠九月己酉宮苑使焦
繼勳自軍前押范延光牙將馬諤齋歸命請罪表到闕
壬子延光領部下士素服于本府門俟命有詔釋罪

己卯詔司空兼門下侍郎平章事馮道官一品給門戟

十六枝中書侍郎平章事桑維翰李崧給門戟十二枝

己未宣遣靜鞭官劉守威左金吾仗勘契官王英司天

臺雞叫學生商暉等竝赴契丹庚申契丹使人往洛京

搬取趙氏公主

宋史趙贊傳德鈞父子降晉契丹盡銅之北去贊獨與母公主留西洛天福三

年晉祖命贊奉母歸薊門

襄州奏漢江水漲三丈出岸害稼東都

奏洛陽水漲一丈五尺壞下浮橋乙丑于闐國王楊仁

美遣使貢方物回鶻可汗遣使貢駝馬丙寅趙延壽進

馬謝恩放燕國長公主歸幽州范延光差節度副使李
式到闕奉表首罪兼進玉帶一條遣宣徽南院使劉處
讓權知魏府軍府事已已復范延光官爵其制略曰頃
朕始登大寶未靜中原六飛纔及于京師千里未通于
懷抱楚王求舊方在遺簪曾子傳疑忽成投杼尋聞悛
悔遽戮姦回干戈俄至于經時雷雨因思于作解果馳
賓介疊貢表章向丹闕以傾心瀝素誠而効順而況保
全黎庶完整甲兵納欵斯來其功非細得不特頒鐵契

重建牙章封本郡之土茅移樂郊之旌鉞至于將吏咸
降絲綸於戲上玄之運四時不愆者信大道之崇三寶
所重者慈活萬戶之傷夷息六師之勞瘁遂予仁憫旌
爾變通永貽子孫長守富貴敬佩光寵可不美歟可復
推誠奉義佐運致理功臣天雄軍節度管內觀察處置
等使開府儀同三司守太傅兼中書令廣晉尹上柱國
臨清王食邑一萬戶食實封一千戶改授鄆州刺史天
平軍節度鄆齊

原本闕
一字

等州觀察處置等使賜鐵券改

封高平郡王仍令擇日備禮冊命以天雄軍節度副使
檢校刑部尚書李式檢校尚書右僕射充亳州團練使
以貝州刺史孫漢威為檢校太保隴州防禦使以天雄
軍三城都巡檢使薛霸為檢校司空衛州刺史以天雄
軍馬步軍都指揮使王建為檢校司空虢州刺史以天
雄軍內外馬軍都指揮使藥元福為檢校司空深州刺
史以天雄軍內外步軍都指揮使安元霸為檢校司空
隨州刺史以天雄軍都監前河陽行軍司馬李彥珣為

檢校司空坊州刺史李式延光之舊僚也其餘皆延光

之將佐也故有是命庚午遣客省使李守貞押罷幣賜

魏府立功將校辛未以魏府招討使楊光遠檢校太師

兼中書令行廣晉尹充天雄軍節度使十月乙亥福建節

度使王繼恭遣使貢方物戊寅契丹命使以寶冊上

帝徽號曰英武明義皇帝

歐陽史作契丹使中書令韓頻來奉冊

是日左

右金吾六軍儀仗太常鼓吹等竝出城迎引至崇元殿

前陳列如儀鄆州范延光奏到任內庚辰御札曰為國

之規在于敏政建都之法務要利民厯攷前經朗然通
論顧惟涼德獲啓丕基當數朝戰伐之餘是兆庶傷殘
之後車徒既廣帑廩咸虛經年之輓粟飛芻繼日而勞
民動衆常煩漕運不給供須今汴州水陸要衝山河形
勝乃萬庾千箱之地是四通八達之郊爰自按巡益觀
宜便俾升都邑以利兵民汴州宜升為東京置開封府
仍升開封浚儀兩縣為赤縣其餘升為畿縣應舊置開
封府時所管屬縣竝可仍舊轄屬收管亦升為畿縣其

洛京改為西京其雍京改為晉昌軍留守改為節度觀
察使依舊為京兆府列在七府之上其曹州改為防禦
州其餘制置竝委中書門下商量施行丙戌以護聖左
廂都指揮使曹州刺史張彥澤為鎮國軍節度使以工
部尚書裴皞為尚書右僕射致仕是日詔改大寧宮門
為明德門又改京城諸門名額南門尉氏以薰風為名
西二門鄭門梁門以金義乾明為名北二門酸棗門封
邱門以玄化宣陽為名東二門曹門宋門以迎春仁和

為名戊子以右金吾大將軍馬從斌為契丹國信使考

功郎中劉知新副之以前天平軍節度使檢校太尉同

平章事安審琦為晉昌軍節度使行京兆尹襄州奏江

水漲害稼壬辰以樞密使中書侍郎平章事集賢殿大

學士桑維翰兼兵部尚書皆罷樞密使

案以上疑有闕文據通鑑攷異

引晉高祖實錄維翰與李崧並罷樞密使

戊戌大赦天下以魏府初平故也

庚子楊光遠朝覲到闕對于便殿錫賚甚厚于闐國王

李聖天冊封為大寶于闐國王以杭州嘉興縣為秀州

從錢元瓘之奏也十一月甲辰樞密直學士祠部員外郎吳涓可金部郎中知制誥樞密直學士庫部員外郎吳承範可祠部郎中知制誥乙巳鄆州范延光來朝丙午封閩王昶為閩國王加食邑一萬五千戶又以中吳建武等軍節度使檢校太師兼中書令蘇州誠州刺史錢元璪為太傅以清海軍節度使廣州刺史錢元璿為檢校太尉兼中書令仍改名元懿應付魏府行營將校及六軍諸道本城將校等並與加恩戊申以門下侍郎

平章事監修國史判戶部趙瑩兼吏部尚書以威武軍節度福建管內觀察處置等使王繼恭為特進檢校太傅仍封臨海郡王以魏博節度使楊光遠為守太尉洛京留守兼河陽節度使判六軍諸衛事端明殿學士尚書禮部侍郎判度支和凝改尚書戶部侍郎充職庚戌鄆州范延光上表乞休退詔不允辛亥升廣晉府為鄴都置留守升廣晉元城兩縣為赤縣屬府諸縣升為畿縣升相州為彰德軍置節度觀察使以澶衛二州為屬

郡其澶州仍升為防禦州移于德勝口為治所升貝州為永清軍置節度觀察使以博冀二州為屬郡以西京留守高行周為廣晉鄴都留守廣晉府行營中軍使貝州防禦使王延肩加檢校太傅充相州彰德軍節度使廣晉府行營步軍都指揮使右神武統軍王周為貝州永清軍節度使甲寅以范延光為太子太師致仕丙辰以祕書監呂琦為禮部侍郎歸德軍節度使趙在禮改天平軍節度使昭義軍節度使兼侍衛親軍馬步軍都

虞候杜重威改忠武軍節度使忠武軍節度使侍衛親
軍馬步軍都指揮使劉知遠改歸德軍節度使前河陽
節度使兼奉國左右廂都指揮使侯益改昭義軍節度
使癸亥割濮州濮陽縣隸澶州詔許天下私鑄錢以天福元
寶為文丙寅冬至帝御崇元殿受朝賀仗衛如式十
二月甲戌朔以前兵部尚書梁文矩為太子少師以
鎮州節度副使符蒙為右諫議大夫以吏部郎中曹國
珍為左諫議大夫丙子以前涇州彰義軍節度使李德

琉為晉州建雄軍節度使加同平章事以皇太子右金
吾衛上將軍重貴為檢校太傅開封尹封鄭王加食邑
三千戶戊寅大寶子闡國進奉使檢校太尉馬繼榮可
鎮國大將軍使副黃門將軍國子少監張再通可試衛
尉卿監使殿頭承旨通事舍人吳順規可試將作少監
回鶻使都督李萬金可歸義大將軍監使雷德順為順
化將軍是日詔宜令天下無問公私應有銅欲鑄錢者
一任取便酌量輕重鑄造戊子以河陽潛龍舊宅為開

晉禪院邢州潛龍舊宅為廣法禪院龍武統軍李從昶卒
輟朝一日贈太尉

舊五代史卷七十七

舊五代史卷七十七考證

晉書高祖紀三八月戊寅以左僕射劉煦為
契丹冊禮使左散騎常侍韋勲副之給事
中盧重為契丹皇太后冊禮使案歐
陽史八月戊寅馮道及左僕射劉煦為
契丹冊禮使通鑑戊寅以馮道為太后
冊禮使左僕射劉煦為契丹主冊禮使與是書
此紀異

左金吾仗勘契官王英司天臺雞咉學生商暉等 王
英歐陽史作王殷商暉歐陽史作殷暉蓋是書避宣祖諱
九月己酉宮苑使焦繼勳自軍前押范延光牙將馬諤
齎歸命請罪表到闕壬子延光領部下士素服于本
府門俟命有詔釋罪 案歐陽史作九月己酉敕范
延光蓋併書于奉表請罪之日也

以右金吾大將軍馬從斌為契丹國信史考功郎中劉
知新副之 案馬從斌使契丹以報其加尊號也考

通鑑則始以命王權權辭以老疾乃改命從斌耳歐
陽史止書從斌不載劉知新五代春秋作十月馮道
使契丹

舊五代史卷七十七考證